

Naqqiut 3

Siunnersuut- Maajip 24-at 2018-meersoq taarserpaa
(Siunnersuummi § 2, imm. 1 naqqiuteqartoqarpoq. Inatsisip atuutilerfissaa naqqiinnermi tunngassuteqarpoq, “ulloq 1. Juli 2018” allangortinneqarami “ulloq 1. Januar 2019-inngorluni, naqqiuteqarnermi peqquteqarpoq qallunaat folketingianni ulloq atuutilertinnagu suliarineqaaqqaassamat. Naqqiummi 2-mi ullup atuutulerfissaanut tunngasumik naqqiisoqarpoq).

Kalaallit Nunaanni sulisilluni ajoqusersinnaanermut isumannaarineq pillugu inatsisip allangortinneqarnera pillugu Namminersorlutik Oqartussat oqaaseqaatissaat pillugu Inatsisartut aalajangiiffigisassaattut siunnersuut.

(Utoqqalinersiuteqalernissamut ukiut qaffakkiartortinneqarnissaasa malitsigisaanik allannguut)

Aatsitassanut, Suliffeqarnermut Nunamullu Namminermut Naalakkersuisoq

Saqqummiussissut

Aatsitassanut, Suliffeqarnermut Nunamullu Namminermut Naalakkersuisoq

Siullermeerinnineq

Inatsimmi allannguinnissamik siunnersuutigineqartup siunertaraa qularnaassallugu inuit sulisinnaanerminnik annaasaqarsimasut imaluunniit pilersuisuunerminnik annaasaqarsimasut taartisiassaminnik utoqqalinersiuteqalernissami tungaanut akilerneqartarnissaat.

Ullumikkut taartisiassanik akiliisoqartarpoq 65-inik ukioqalernerq tikillugu. Tamannalu Sulisilluni ajoqusersinnaanermut Kalaallit Nunaannut inatsimmi allassimavoq. Tamanna maannamut naapertuussimavoq 65-inik ukioqalernermit utoqqalinersiuteqarsinnaanermut.

Kisiannili maanna ukiut utoqqalinersiuteqarsinnaalerfiusartut qaffanneqarsimapput ukiunut 66-inut, aammalu 2021-imiit ukiut utoqqalinersiuteqarfiusinnaasut qaffaqqinneqassallutik ukiunut 67-inut.

Tamanna isumaqarpoq inuit sulisinnaanerminnik annaasaqarsimasut imaluunniit pilersuisuunerminnik annaasaqarsimasut taartisiaminnik akilerneqartarnerminnik annaasaqarsinnaasut 65-inik ukioqalernerminniit, ilutigisaanillu suli utoqqalinersiutisiaqalersimanatik.

Inatsimmik allannguinnikkut sulisilluni ajoqusersinnaanermut isumannaarineq pillugu Kalaallit Nunaanni inatsimmi oqaasertaliussat allanngortinneqassapput, taamaasillunilu taartisiassat utoqqalinersiuteqalernissap tungaanut akilerneqartalissallutik. Taamatut aqqissuussinikkut qularnaarneqassaaq siunissami sulisinnaanermik imaluunniit pilersuisinnaanermik annaasaqarsimanermut taartisiassat akilerneqartarnissaat ukiut utoqqalinersiuteqalerfiussat qaffanneqarnerat imaluunniit apparneqarnerat apeqqutaatinnagit.

Siunnersuummi illersorneqarput inuit siunissami sulisinnaanerminnik imaluunniit pilersuisuunerminnik annaasaqarsimasut taartisiassaminnik pissarsiassaqaannarnissaat.

Siunnersuullu aamma isumaqarpoq pingaaruteqarlunilu inunnut ullumikkut sulisinnaanermik pilersuisuunermilluunniit annaasaminnik tunngavilimmik taartisiassaqaartinneqartartunut, 65-inillu ukioqalernermikkut annaasaqartussaagaluartunut.

Taamatut oqaaseqarlunga siunnersuut Inatsisartunut inussiarnersumik suliassanngortippara.